



09972

周忠愍奏疏卷一

明周起元著

劾徐兆魁疏

涇縣潘錫恩校

周起元

書

臣惟士人立身稍有識嚮莫不仰止賢哲豈惟考槃之英不忍當吾世而失之卽前修往矣弔古而想見其人猶津津有餘慕焉近見太僕寺少卿徐兆魁與言官抵辯學步王國已屬縱恣矣猶曰自覆其穢跡也迺疏中有僞學之詆古今載籍所列一語臣尤深不滿焉夫詆僞學之見於載籍者非韓侂胄柄政時沈繼祖劉三傑爲言官建疏力申僞學禁而蔡元定黃直卿諸儒緣坐貶斥者乎古今載籍多矣兆魁何不摘名教中一二美事言之而獨引此僞學一條以爲考信於載籍甘同調於繼祖三傑爲也最可恨者楊時羅汝芳等諸儒亦敢肆譏評卽就臣少時所識羅汝芳一人

乾坤正氣集

卷三見七

一

言之汝芳學嚴屋漏遵度率軌一言一行爲世準的臣頃閱粵東請諡冊內稱原任吏部侍郎楊起元執贄羅先生而稟學焉往復參證因大悟性命之宗又云一聞羅先生之學謹服膺無須臾離雕一小像出必告反必面歲時約同志奠於所祀之居以爲常由茲言之是粵之名臣且受業於汝芳以成命世而光地靈兆魁顧妄加譏誚其爲粵有識者之共棄可知也夫人有高出一世之行而後可以俯品流俗豈以賢者而程材於不肖乎彼直以攻淮撫一節爲護身符夫淮撫一人進退何足論哉孫丕揚因沈思孝之故惡淮撫卒不移怒於端人貞士此丕揚之所以爲丕揚也兆魁倚王國攻淮撫因而施鉗網之術邀其徒黨謀立四款之單擊名流於當年甚至誅前修於身後陰嗾攻奏以爲利使人角元黃而已又有術以自固此兆魁之所以爲兆魁也只緣以僞學二字

橫據胸中故有種種作用凡天下慷慨直節之士爲流俗所忌卽推入於僞學之門戶以錮之略辨明救正卽以依傍詆之果行兆魁之說其壞人心術禍人國家豈淺哉李膺范滂意氣蓋亦過於激昂其初只因爭成縉匿張儉一二事而釀成黨禁然千古之評不過曰諸君子激以招禍已耳卒何嘗屈膺滂而直覽節乎以此爲衡而邪正可立覆也臣於兆魁無怨而有德獨不忍其沉迷不返姑爲點破以俟其悔醒使不終爲名教罪人耳伏乞皇上將臣疏發議果不合公論將臣罷斥以謝兆魁臣不勝惶悚待命之至

請完封典以通新運疏

臣奉命償漕計領隨大小材官四百餘員輓運漕軍不啻十萬餘衆臣受事以來兢兢焉惟恐當振刷之後復釀廢弛之漸竭力催償凡舊冬奉單運官立冬趨事不許在家度歲凡漕軍駕船回南

乾坤正氣集

卷三百見七

二

俱促令赴兌不許回衛住泊臣豈事苛峻而不體人情哉無非奉新命之嚴切懼凍阻之重累期復漕規使轉輸之卒庶幾今冬早回得徹數日牢處也幸官旗各稟約束以次飛輓而進苟非積缺多船不敢自甘殿後日已聯棹揚帆而渡淮邳矣乃近日各軍咸向臣稟云傳聞封船尚集通灣開駕未有定期河道填塞抵灣起剝皆甚不便恐前此拮据徒勞今冬必復阻凍等情夫此十萬漕軍盡有父母兄弟妻子者也經歲勤動彼獨不念其家乎然所以冒霜雪而南歸旋衝風浪而北進絕內顧之念以赴公家之役者何哉誠以期會在前鞭箠在後國儲綦重阻凍艱難是以割恩愛捐私戀奉功令備勞瘁而不辭也漕河水程四千餘里卽甚疏利尙虞或決或淺或風或雨不能刻日轉粟以登大廩况復加以千艘之攔壅萬役之喧擠寧無滯礙此六七省運卒豈私憂過計也

耶先是布分封之旨合漕員役莫不歡欣色動此軍士忠於國家之公願也茲者稽啟行之期合漕員役又莫不相對憂惶此軍士自慮阻滯之隱情也陛下奈何停閣此必不容己之典章以拂天下之公願而不恤軍士之隱情乎哉夫藩服世爵榮莫逾焉衆建維城典莫重焉朝家舉動非士庶比當循以禮制斷以大義順乎人情顧乃以剛明英果之主操此濡忍不決之心狗小慈而稽大典其何以昭示臣庶而光垂史册乎臣在漕言漕謹補牘以聞伏乞蚤定吉期而臣因得飛軍精以實上國蚤發運艘回空卽七省軍士頌明主而祝萬年歡聲且雷動矣

劾趙煥疏

臣惟皇上御極四十餘年於言官獻替雖罕採納而輒多優容惟觸權輿忤巨奸者其敗不旋踵其錮終身忠臣義士扼腕久矣謹乾坤正氣集

卷三見七

三

按吏部尙書趙煥虧喪大節難以縷陳今營據要地結權璫而招黨與逐總憲而傾善良借事誅鋤兇險惡很近日例推孫振基等三臣皆惡其異已一時芟盡此三臣者非有玷官常干清議而獲罪於皇上也特以議論異同居恒建白詞多與趙煥相觸犯煥恐終不利於己而急修嫌怨預爲翦除以僥倖長竊銓柄耳例推一事明旨令科院從公擬議而趙煥獨擅雌黃略無顧忌是煥之權尊於皇上也乃悻然以職掌爲爭則吏部侍郎方從哲不由會推徑竇躡進顧未聞敢爭執半語何其蓄縮於大臣而很毒於小臣也鮑應鰲起廢謫籍清貞端謹薰蕕不同宜遭煥忌謂不當以祠部改銓似矣乃科推正閏自有往例任意轉移巧用猾手何其苛求於賢者而通融於所睚也有科臣周永春元詩教爲之畫策有可屬李養正郭士望爲之布網彼皆度皇上待大臣有禮不輕呵

謹遂敢度明旨而弄威權逐異議以固爵位夫議論原有兩端雷同誠非國福在皇上尙容臣下盡言以參酌是非之衡在諸臣亦誰願因殿上之爭而自傷和氣趙煥不能擴大公以秉衡渙羣小而事主乃挑彼此之鬪以收一網借言路之歧以營三窟雖自恃羽翼堪耐彈抨恐公論久而澄清豪傑代將輩出雖有善畫三策者無能爲煥効一籌矣例轉何足爲三臣辱特臺綱自此廢墜權奸自此縱橫長此不已將令言官俯首喪氣盡折而入於權門羞熙朝而譏青史臣臺臣也豈能坐視臺綱決裂嘿無一言以希全祿位哉伏乞皇上勅下九院九卿科道會議如果趙煥植黨擅權掃滅臺規違旨報怨卽立賜三臣仍入班行以褫奸謀而肅憲紀若臣所奏不實卽將臣與三臣同罷以謝趙煥臣雖抱膝邱園有餘榮矣

乾坤正氣集 卷二 兗屯

四

請定本折以便新漕疏

臣奉命巡漕幸藉皇上如天之福大小臣工協濟於下起納全完獲免阻凍矣顧臣今年之漕乃民間去歲之米惟去年稍稔有司之徵收早故漕卒之轉運亦早若明年之漕則今年之米也此雖新漕臣爲政而臣目擊江南漕所屬地方若南直隸江西湖廣等處淫雨爲祟洪水稽天見於彼處撫按之所敷奏僉謂數十年所未有業經戶部陸續題覆大約不出緩漕畱賑改折三端除帶徵錢糧及畱稅備賑與亨布折色之類非關職掌不敢槩及外惟是漕例以十月開徵先期派單十二月兌完開行今十月杪矣該部所覆各省全折半改之數尙未卽奉俞旨派者不敢派徵者不敢徵君門萬里小民引領望澤但見勘報疏上便喁喁然以爲有折有蠲竟無完漕之心矣且被害地方野無青草室如懸磬或執技

藝以餬口於四方或業樵漁度命於山澤朝不謀夕安能挾貴鏹越他邦販本色以供牛車如往年江西等處鮮米牽石價三錢今聞騰湧在六錢之上加以副米腳耗統而計之率官民米一石費價八九錢有奇改折利害之數不待持籌而自明也目下卽亟頒恩旨著該部飛檄傳示已逾漕例兩月倘再遲延則漕數本折不定京通邊之數皆不能定各處被災地方漕司無所憑以發派單府縣無所稟以徵稅額豈不本折兩耽軍需大誤而明歲轉運必倍費新臣拮据矣伏乞勅下戶部先將災傷地方原題漕糧南糧各改折分數馬上差人傳檄以便派徵其餘蠲賑浩蕩之恩另候皇上漸次施行國計幸甚蒼生幸甚

乞振朝綱疏

臣仰惟皇上臨御以來英明果毅一號一令悉稟裁奪自以爲無

乾坤正氣集

卷三見七

五

太阿倒持魁綱失馭之病矣近以靜攝日久釜鬻彌深百凡庶政有漸流於下移而莫覺者夫蔽明之奸行於下而不戢之名歸吾君甚可痛也臣不敢瀆引謹以二三時事諸臣所焦舌而陳者申之近者賢令李嗣善蒙釋人人加額至若滿朝薦等救萬人之命功在嗣善上而梁永等戕萬人之命罪又浮於馮進朝乃嗣善獲宥而朝薦長囚則以進朝而波及嗣善也罪闔不付庭理是以恩綸垂渙而中寢也則朝薦等之不獲宥蓋皇上之左右幽繫之也然而禁良令之名則皇上受之矣舊制駙馬體統甚隆今駙馬再興讓以被辱逃已蒙顯罰顧婦寺負辜未聞重創公主不能以保其夫天子不能以庇其女煬竈售奸其何疑焉是興讓之覆寬莫照蓋皇上之左右壅抑之也然而辱戚臣之名則皇上受之矣今以四海之蓄加以礦稅之括入三殿箭樓久乖龍見之期累年不

得報竣何也良由大工未竣墨胥家於是貪瑄家於是稅使又幾幸以免擧而家於是乃別立一種忌諱邪說以默聳而逗畱是工役之不得早就輪奐也皇上之左右因此以爲利也然而廢朝常之名則皇上受之矣放棄諸臣批鱗者不罪觸權者永錮在皇上原無成心第廢臣鯁直之性多爲姦瑄所恨在廷一二宵小圖報效於權門者又從而媒孽焉是以有僞學之牘有說事之單大察有林下黨人之欸又慮臺省中爲之發憤而明其不然則先設依傍之名日以震懾之甚且造爲蜚語曰考選時某人推轂某欲科卽科欲道卽道不惟布之道路且明告君父使人憂讒畏譏不敢昌言昭雪而護持正人者日益寡一任彼摧殘蹂躪莫敢誰何而後愉快又廣爲之挑怨一切不得於輿評者皆歸其禍始於草野曰是某林下所構害也如湯賓尹事未發時徐兆魁且預爲之疏

乾坤正氣集

卷三百九七

六

曰東林所以逆折賓尹者其跡已見諸如此類難以枚舉是以怨毒益騰而忌且怒之者日益衆護持旣寡忌怒又衆卽大小臣工虛心旁觀者漸至熒聽且咎諸賢之不隱鱗戢羽而爲此孤憤也是以正勢漸孤又有好人陰通於禁中安排謗訕而中止之是廢臣之不獲賜環也蓋皇上之左右挫遏而沉淪之也然而錮忠良之名則皇上受之矣此數者皆叔季苟且之紕政非熙朝所宜見也皇上清夜思維必不願被此名而今且冒而行之昭之臣庶垂之史冊天下後世以皇上爲何如主然實非皇上之本情由左右近習爲搆鬪或於酣樂之餘爲有心之蒙蔽以塞明或以閑暇之際爲無心之點撥以先入歲月浸淫落其術中而不覺久之且習爲故然矣伏乞皇上憬然發寤收攬乾剛於滿朝薦等釋之囚圜揚應吉梁盈女重加刑治大役立限報竣邁輔之英檢本章盡拔

淹滯布列庶位此不過頃刻一轉念而叔季紕政變而爲熙朝盛事天下後世稱英君諠辟必歸皇上矣臣一念朴忠忘其忌諱補牘陳言仰垂清覽臣不勝惶悚待命之至

劾監稅高宗疏

福建稅監高宗素行貪殘甚於別璫歷年海商一切貴重美麗奇巧之珍百入於宗與參隨未必一貢於朝廷臣生長之地耳而日久之久矣谿壑既盈虐聲久著不意益肆鴟張大開狼噬剋削閭閻殫膏竭髓皇上取用各行物料卽一草一木莫不按數予值而宗劉劄樓船連舸接軸揭百尺之帷檣窮雕飾之極麗所取物料槩欲白沒彼市鬻貿易之夫挾貲幾何令一旦盡付烏有誰能甘之相牽控取自無足怪何乃簡臬雄以作威陳利兵而相向揮刀戮二十餘人又放火延燒二十餘家越日披堅執銳統率驍騎乘守

乾坤正氣集

卷三頁七

七

衛之偶撒徑弄兵於轅門撫臣袁一驥節制一方宗不能遂其場澤之貪夙懷忿憤按劔要挾副使李思誠僉事呂純如捋虎鬚以解厄宗復畱而要盟皇上試思從來稅監最貪最狠最毒如高淮梁永陳奉孫朝楊榮輩曾有殺人放火劫節鉞要畱方面如宗之大逆不道者乎臣讀撫按疏揭參以鄉人見聞不覺髮指而繼之以痛哭也近者邢洪馳兵器於禁地虛受假狐威於票擬皆漫不處分今宗又見告矣所當亟行兩觀之誅用雪萬民之忿非僅撤回械鎖可以了事者臣聞省會人情洵洵莫不欲得宗而甘心焉賴巡方與在事諸臣安輯撫綏幸未告變臣恐防川不決決必滔天宿火不發發必燎原萬一戈矛起於肘腋海濱因而搖動倭人乘以生心宗粉骨不足惜皇上豈善爲社稷計乎宗之言曰多進孝順便可保全首領宗以累年之括搜挾百萬蓋藏出其珍玩綺

鼓歌舞角觝享用作樂之賡賫可以結左右之歡而及於寬政倘一遂其好是皇上不惜太阿之重而僅易此阿堵也示之臣庶昭之史冊虧累令名豈淺鮮哉

請用李瑾凌漢狝疏

邇來時政至吃緊而未快於人情者無如李瑾科印凌漢狝倉差兩事夫朝廷衆置官聯領文憑者出而展采候考選者入而紆丹今垣長久缺於彼繫垂行之足於此阻嚮用之心乃若視儲臺差寧獨供玉粒而實倉箱七省利病三軍命脈於是乎係今既滿者疲於積勞註差者稽於受事此二官者於本等名位非有躋崇陟廕之榮也而闕皇上用人理財之務則綦大此二臣者卽未蒙允用猶然瑣闥柏臺之重也而廢皇上之紀綱法度則已多諸臣亦既焦屑敝舌連編累牘以入告矣而天聽彌高也求其故而不得

乾坤正氣集

卷三百九十七

八

咸責望於閣臣閣臣不能得咸歸罪於關豎蓋由李瑾嘗覈工料而杜中涓之侵牟凌漢狝嘗持三尺以撼寺人之兇焰此於陛下謀則忠於陛下之左右則拂二三用事之貂璫盡是同心之狐兔窺伺已熟煬竈成奸催牘或未塵於宸覽俞綸乃忽越乎半年不然纍纍若若銜恩命而奉職業者未嘗終吝弗子何獨斬此七品官也天下其孰能爲皇上解乎蓋皇上雖英明天縱然與士大夫隔絕既久九閭崇邃中獨此輩朝夕密邇必有潛受其欺蔽而不及覺者此端一開將掃除之役漸至竊弄官爵之權唐宋宦官之害行復見於今日矣職等不勝私憂過計於是合詞奏請惟聖明少垂聽焉職等不勝激切待命之至

乞裁藩邸求請疏

臣聞天子不言有無諸候不言多寡夫豈盡忘其有無多寡之心

哉誠不敢括公賦爲私積而欲藏殿富於百姓耳是以善爲君者每作法於儉以昭子孫臣庶之則而君之善愛子者亦必範以禮義定以經制教之賤貨而尊讓遠利而尙廉以母損令名臣接邸報見福王一本爲比例懇乞賜給鹽井茶銀奉聖旨著查照潞王例行該部知道欽此臣竊歎福藩之拙於自謀陛下之薄於愛子也陛下以天下爲家未有不保其民而保其子者福藩之所爲遜恩寵而算錙銖者亦旣不遺餘力而攘利矣猶覬及四川之鹽井乎試思今日四川如何景象乎播土征魂尙作春閨之夢建昌成血復染瘴草之煙水西伏戎時露跋扈之形衆豕入豈每懷走曠之想蜀固羸國也天未厭禍又剝利以佐災無乃不可乎頃者皇太后遺詔蒙陛下推廣孝思加惠四海維時二三老臣曾蒞蜀者力陳鹽課之累是以恩詔鹽井有課無井者著撫按官議諮蜀人

乾坤正氣集

卷三十九

九

方引領望澤而可頓壅德意乎夫陵谷尙遷徙無常鹽水歷幾時而盈竭異又歷幾時而鹹淡異非永永濬於不涸之源也井敗課存竈戶之賠納不堪相率棄業逃亡矣賦額且不能取盈遑遑派賠州郡以足京邊之需彼土之官自撫按而下莫不計露於捉襟而籌窮於借筭矣潞府之例舊稱難支福藩之富無容再益前者求開鹽厥今者復求鹽課長此不已意欲何極將扣之額徵之內乎抑增之額徵之外乎扣之則軍國餽餉之需歲有常數不可虧縮也增之則巴蜀罷敝之餘倍算加緡又必不能輸應也況陛下聖子神孫振振方興今日引潞藩以爲例他日必有引福藩以爲例者陛下又將同之以槩爲賜乎抑異之而偏靳其子乎異之則等屬天潢之派未可厚薄視也同之則盡括惟正之供未必足爲宗室贍也臣竊謂福藩之規規此請也於殖貨則利於德義則愆

陛下之沾沾此愛以於私情則率於法制則違夫素約之家常有餘饒兼并之室日懼不給何者奢儉之致異也計福藩所入不爲不厚矣以好善爲樂則保有令名以節嗇爲寶則永不乏匱陛下何不裁之以義教之以儉俾知國家有一定之賦分封無濫乞之規事必師古法以制情不以反汗爲嫌收回成命則福藩沐皇上之慈愛更倍於錫子之恩其子孫黎民之利不亦溥乎臣又有請焉一人作法天下之則也涼貪之弊其應不爽陛下年來務鳩聚而廣誅求藩王象之又何責焉願皇上下明制遵太樸愛人力惜國用一切支討盡從削減奇珍異綵不爲飾峻宇雕甍不爲崇方物曲獻不爲喜弛山澤之禁而爲散財發粟之仁捐貨利之私而爲投珠抵璧之念行見風聲一倡臣庶景從天子不言有無而諸侯王敢於言多寡者未之有也此躬行之效身教之說陛下誠能

乾坤正氣集

卷三百九十七

十

俯採臣言翻然更始則薄海內外咸仰聖明毓德於青宮者將習睹節用之規而消欲賄之萌况屏翰於列藩者其敢聽宵小之謀而恣無厭之請哉臣區區上陳不勝屏息待罪之至

題請銓部核實以廣用人疏

張光房等五人吏部詳於又單而置其圈點備於北員而虛其南額輕去奉旨之言官空懸急缺之風憲臣具疏糾駁非不知救者愈力忌者轉深吏部終持成心樅點當且朋出諸臣所謂愛之而實以害之良非虛語然衆論雖爾紛淆人品自有定價官秩不以冷要別五人之生平天下且以處置定吏部之當否卽臺臣劉光復亦云五臣未見端倪衆論過爲揣度近太宰鄭繼之疏稱不願有單若有意於虛受者然摘出濮中玉考語册中有識闡行窒頗有怨聲兩言吏治以清端通明爲最闡窒致怨斯誠有司之疵類

矣中玉既負此疵類何以計典不黜幽巡方不白簡舊歲咨訪不
外推累年吏部不覺察而令其得並與考選言官之列乎其或才
善粉飾習工彌縫以有今日耶如此則眞爲不肖者或清直似欠
員通執持鄰於任怨久而論定耶如此則未可謂非賢吏部以甄
敘流品辨論官材爲職者也不肖者以砥砭而混玉斯當與天下
共棄之誰得曲而庇焉從前吏部且當追坐不察之罪若賢者以
萋菲而鑠金當亟爲湔雪以明其不然似未可抹截上下全文單
摘出一二字面而盡置各撫按司道連篇累牘清眞之上考百千
言於不道也總之人品之賢者不一有純瑜而無瑕者有似瑕而
實瑜者不能察其眞實之分又不究其毀摘之故其可輕相天下
之士而稱知人之哲乎吏部惟覆舉劾降調斥黜之疏可以單款
上聞今卽欲改彼部曹豈宜輕置雌黃之口此一舉也職謂苛求
乾坤正氣集

卷三兒七

十一

於應別去畱之日已非愛惜人才之意苛求於不應別去畱之時
益非保全善類之心繼之而非賢者則已如其賢者必有以受職
言矣若辛亥以來韓敬科場覺發奇事疊出朝端紛紛多故彼此
攻擊飛語欵單不絕於長安或張一以爲百或憑虛以構實重則
遭撲滅輕則蒙增繳大小臣工未易悉數極此不已世道何所底
止伏乞陛下速下新考選諸臣以廣言路之益仍將張光房等速
賜裁斷擬授以結目前之局世道幸甚

請治漕河要務疏

漕弊亟宜湔除莫過於陋規常例遞而下之武弁吸軍而軍吸民
遞而上之軍奉武弁武弁奉各衙門諸役使費此其弊誠罄竹難
書要之臣力所能制者臣得禁之臣力所不及制者賴在事諸臣
共禁之不敢贅陳楮上以瀆聖覽惟事有最急而必仰賴天言之

可擘者有二謹掇其樞要爲皇上陳之其一曰治舟其一曰治水無舟則無漕無金錢則無舟清江厥積缺漕船不止千艘矣查據淮安府冊開南京工部歲應解漕庫銀一萬八千餘兩無論遠者止以十載計之且欠七萬有奇矣此項銀取給蕪關船料儻使本關通該部而該部通漕猶可言也臣詢清江厥索查蕪關歲徵解俱如額今漕帑窘匱極矣在別款者猶宜酌盈濟虛況本項而容拖欠乎應將歷年掛欠銀兩發解補造舊缺卽未能全完缺額亦可足七百艘之料事在燃眉同舟共濟計該部必不秦越視矣至於董造之官或專責本廠以單役或如蘇松常鎮事例分任道府以効猷聽總漕另議請奪此治舟之說也兌糧在北幫者約千餘隻此不由閘可五六月竣事者也以南幫言漕規不有十二月過淮者乎淮離泲三百里可二十日達今泲必以三月濬完始啟

乾坤正氣集

卷三見七

七

閘也由閘約有八千艘窮一日力可過重運六十通漕積之必百四五十日乃竣已五閱月矣首幫入閘以三月尾幫入閘必以七月泲至壩亦須百餘日首幫抵壩以六七月則尾幫抵壩必以九月十月此挨次相承必然之勢也不有風雨灣泊乎不又有漂撈停闕乎一舟阻則一幫俱滯一幫阻則各幫皆滯況白河剝船多缺稍稍延緩轉眼便入冬序凍糧數十萬易耳今應嚴爲二月開泲之令泲河冬間挑濬約百日可完向者募邳睢桃宿滕嶧等州縣里甲民夫赴泲開挑近者數十里遠者離二三百里往返途程既稽時日又客夫無地住宿憚遠役如赴湯火於是爭出重費貼夫頭及賄督工官官之墨者率以賄脫之虛報名數十不得五之用而民間又稱疲敝所在怨讟臣查得泲河貧民食力於挽拽者趾相錯也已行淮徐兗東濟寧三道會議就泲河原額夫東直兩

地共一千三百餘名後有泃工議就額夫著於沿河土著居民踣募應用不得憑信夫頭遠募各州縣里甲騷動各屬可以蘇民間之積累可以活泃河之貧傭而又無往返之苦住宿之艱督工官易於稽查已經屬道呈詳有成畫矣但濬挑稍遲漕事便誤宜每歲勒限於十一月初旬興工正月刻期集事二月務使通利行漕報巡漕御史督舟入泃有違限者分別議懲庶人心肅而諸艘早達漕規可復矣此治水之說也以上二說無奇而切於實用伏乞勅下工部亟爲議覆咨行南京二部於節慎庫貯蕪關料銀查解漕司轉發勒限補造積缺船數將挑濬泃工咨行總理河臣分委嚴督務依今限開通正月末旬報完以裨利涉運務庶得早完而國計民生均有賴矣

請修河工疏

乾坤正氣集

卷三頁七

三

臣觀黃河徐邳一帶狼矢溝亘其北三山口繞其南決於北則水灌磨臍溝及周柳等湖溢衝泃直而運道阻三十九年狼矢決壩是已決於南則水射符離浸灌徐宿靈睢之間川陸連濤原隰通望甚則漲漫歸仁卽不甚而決口斜分正道水落泃流徑瀉難以積蓄猶兒窩直口等處必致淺澀而運道亦滯四十年三山決口是已臣盱衡極慮竊求所爲善後之策爲皇上陳之聞之善爲川者決之使導凡黃水旁溢於衝崩之地必蕩刷轉深而於故道必突生澱淤從有河患以來未之有改也今三山徒堵塞決口而正道淤土未濬上流宣洩不利勢必侵齧兩旁新堤土脆旣力不能抵而徐靈地形卑窪又爲水性所趨奈何不重潰也據淮徐道右參議袁應泰勘報韓壩應挑開故道淤土不過三里兼築埽臺截水衝刷功力不繁刻日可就此實爲喫緊第一務則濬淤澱以通

下流宜亟也遙縷格三堤捍障歸仁今三堤漸就礎薄蓋因先河臣曹時聘蘇莊太行之役糜用百萬盡移徐邳睢宿挑清之河銀爲曹單蕭瑒之用致迤南土堤累歲缺修凌夷坍塌蓋積漸以至於今矣儻值伏秋怒流長河激浪爲患匪細豈可泄泄此時以貽萬一於異日則修遙縷以保歸仁宜亟也捧沙塞酒諺之所譏黃河多浮沙而少老土今夫役憚於揀取膠泥河官先立標記然後一時雖漸累高遇流便復刷去宜擇認油泥河官先立標記然後挑用不得希圖省便雜用鬆沙查先年總河王曾製鐵錐其銳造爲團圈於告完時巡行插取底土出驗分別功罰此法甚善則辨土以固堤根宜飭也調集丁夫萬室奔命置買物料行市傾資非有廉幹河官以綜理調劑其間不特虛冒欺蒙公私困匱而追呼凌厲科貼繁興衆口怨咨流離載道有甚洪水爲災者後有缺員

乾坤正氣集

卷三百七

十四

宜於濱河州縣擇其仁廉明幹者總河會撫按咨揭送部以充其選三年內有能先事預防臨事克濟又能綏輯窮民不致怨咨者優以殊擢若怠玩失事剋削侵漁者輕則斥逐重則挈問庶激勸行而人知鼓舞則揀賢能以充河員宜亟也蘇軾有言曰水官之利與河工猶邊臣之喜開邊事臣訪沿河胥典徭作河少決則小利大決則大利蓋工額廣繁可恣包冒每遇封築外形非不繕完中實鬆脆未嘗竭力春夯以求牢固幾幸旦夕有患以覲營爲何者彼其自活之計必出於此也夫千仞之堤潰於螻穴方易爲力時不加料理及至水勢洶湧世界陸沉淖桑田而漂廬舍乃始議動大役搜揭帑銀以充浩費而竟莫奏負薪之効每畱瓠子之歌良可痛也此無他故失事之罰不嚴而先事之備不預也宜將各役董督處所按段勒名登之冊案三年內若上流不漲而無故自

決者罪無赦往者值伏秋時飭各夫常住舖舍晝則鳴鑼巡視夜則擊柝傳籌一處破綻立刻傳集衆夫協力葺治又險要之區原各置有廠場貯椿木柳枝柴草繩纜等料以待急需宜申嚴舊制責令審夫時時以各處單薄罅隙之狀上聞預加封培仍量動歲修銀買料貯廠卒有告急管河頭目傳聚衆夫用裹頭填築若有將決而失於預報及報決而物料不畢集舖夫不齊到者罪無赦則嚴失事以絕奸玩預積備以防倉卒宜講也約而言之治河之策要不越疏與築古者疆理區甸不與水爭地度其所必趨而利導之故其疏也易今田廬城郭星羅棋布略無贖壤如徐邳間北控洳直南瞰歸仁惟中存一線通此急濶寧復別有可注之壑施疏決之功哉往者黃垺議畱水口貽患全河繼之黃家壩議開分黃四十餘萬竟填巨壑以往事券之疏之情形未易言矣臣所請

乾坤正氣集

卷二見七

五

復故道不過就本河稍決堆積挑澱淤耳策無奇而實切於利害所恃又全在牢其地脚厚其隄防以約束之使不旁泛臣又觀徐邳隄形高並民舍湍與隄平無異以垣居水稍稍衝破傷殘無數逾歷數月尙未乾涸昔歐陽修言汴隄與居民簷廡相等力請開洶與增築並行今之徐邳何以異此乃若連興工作募役輸料歲無寧日嗟此子遺苦於水復苦於治水則於勞民時寓安集撫綏至意誠不可不亟圖也伏乞皇上省覽臣奏下采葑言於河事或

小補而生靈亦永賴矣

周忠愍奏疏卷二

明周起元著

涇縣潘錫恩校

奏爲夙疾日增請速允放疏

臣荷皇上任使畀以撫綏重寄驚足雖不能以聘其長驅鉛刀亦願勉効其一割苟非身實不任何敢託病求歸臣有犬馬之疾下血嘔逆緣昔年柳州救荒染瘴一病濱危載移潞河以戎馬之役終年拮据神氣益耗自奔馳南北以歷今官蓋八載於茲鬚髮如絲蒲姿欲謝簿書鞅掌舊病頓劇去冬今夏會兩疏乞骸我皇上不卽擯斥且諭以安心供職又諭以盡職著勞值茲年荒又諭以拯救便宜矣屢荷天語叮嚀仰見皇上之待臣下也有恩有禮至厚至隆敢愛頂踵而忘報塞惟是臣自遭地方水災以來凡荒政所宜行者非不與有司次第講求然欲爲皇上普如天之德而不

乾坤正氣集

卷三頁六

一

能作無米之炊欲爲司農分仰屋之憂而不忍行剗肉之政兩念躊躇思慮困衡食不下咽寢不貼席臣才之不慧於此槩見而臣病之侵尋亦緣是轉增矣從來荒與亂相因黃巢王仙芝之亂皆因饑饉而起今數月間仗皇上威靈雖保循暫安而水族聚居之民轉徙殆盡江湖綠林之警又時防竊發必得一宏猷碩望者方勝其任而臣猥以頽廢之軀長處非據欲蒞事則病深欲理病則事廢豈惟素尸竊位有覲面目恐以養病而轉釀廢弛遺封疆之累不少矣竊見此時卿寺多賢濟濟布列伏望皇上念臣累疏允臣歸休一簡用間則賢者毋致歎於積薪而臣亦以免貽譏於負乘也

請循織造舊例以寬物力疏

臣查得江南有袍緞有歲造有改造此三役者卽江南之所出而

還以竭江南者也臣非敢龔腐儒之見侈言澣衣焚裘往事以損山龍黼黻之觀顧有奢而不度者當亟爲裁汰奉行之人有借公營私者宜塞其弊竇皇上當無以服御一節而忘衣被天下之仁臣亦安敢不效補袞微忠而自貶鵜翼之誚也哉頃者織監李實誣劾有司強以屬禮驟變歷年規例創一駭人觀聽之說其倉縱之狀天下人知之諒皇上必能照之己經按臣交疏彈駁外今臣仰稽舊制下採輿情臚列利弊數端皆可無損於上供而有裨於窮簷者望皇上畱神採擇施行一曰額數之宜酌臣案查神宗四年所派袍緞僅五萬八千七百六十六疋後隨蠲免二千四百疋我皇上新御原派九萬五千八百四十四疋奉明旨減三分之一是尙有六萬三千八百九十六疋也今邊境侵削勤師數年公私交匱視神宗時豐亨豫大景象甚不同矣謂宜倍崇儉約乃反浮

乾坤正氣集

卷三頁六

二

出五千一百有奇其何不明於盈詘之數耶合照萬歷四年例再酌減派一曰解數之當覈查得往時織造派多而解少臣訪往日之弊監書與府胥輒先期串通那動庫貯及其解運疋數多有短少時久匠累撫按不得已爲之合詞請蠲縱使蠲免而銀己先支殊不見有分毫節省機戶亦並無受惠今蘇松庫藏如洗一有軍興之需各束手仰屋坐此弊也合無每運卽開實造若干疋實給若干銀一曰價料之當節查得緞疋原無疋派今就蘇松兩府而言止於四司料銀支用乃合兩府料銀春秋兩運共四萬四千餘兩合十八運該銀三十九萬六千兩此僅蘇松四分之數而浙直不與焉浙直合之以百餘萬計亦綦奢矣歲額雖係惟正之供然窮民難十分全足時完至七八分而止臣不敢不嚴行催督共圖急公然於料銀有終歲鞭朴不能全完者宜蠲一二分以甦凋瘵

若必銖鏹取盈民何以堪總之緞價原估浮時值數倍織監苟稍稍存心濟物必不藉口短價而弗畱不盡於民間也一日船隻之難增臣查得神宗四十四年蘇松每年二運今織監於蘇松又欲增二隻不惟水手船頭工食銀兩終難加派而一路夫廩之費幾當袍價之半實則一運之袍可二三船而足今每船不過寥寥數扛皆地方射利之徒攬貨進京沿途免稅計所免之稅又可當袍價之半也合照舊額裝運若欲加派以添船臣不敢也一日蘇松只遜之宜免查得只遜舊派應天等數府蘇松既織袍緞從來不派只遜蓋龍章爲重則他造不得再與非獨以緩物力亦以隆盛典也近不知緣何又派蘇松造只遜二千副豈惟匠役不堪亦且深乖典制一日浙直道途之宜酌查得歲計緞疋祖制原屬有司萬厯三十年鹽監魯保招權貪利將此項攬收監督各匠怨詈後

撫按言其不便遂仍歸有司今織監又奏奪歸監有司從此豈不省一番勤勞但在有司則隨府可驗可解在該監則一領一驗一解自南直應天等各府至杭往返遠者跋涉千餘里近亦不下數百里往返病民之狀然則該監亦豈應踵魯保之故智而皇上豈可不法神祖之轉圜也耶一日羨餘之當積查得萬厯年間每疋扣羨四錢解進已蒙恩詔豁免矣然拖欠者免追而在庫者宜貯若一槩花銷既不在民又不在官徒飽奸胥之腹而已合行將前項清查存貯以備緩急斯亦節用裕餉之一端也以上七款不過述已然之成例剔將來之弊端皆事理明白易見切實可行者非敢厚望皇上樽節但求不大耗公帑又非故與該監齟齬但求不大拂民情耳至於假參劾以竊弄威福議屬禮以顯肆恣睢則江南數十年來中使之所未嘗見人情共爲不平而該監亦自悔其

謬妄不待臣言之畢也伏乞勅下該部覆議亟賜採擇施行

請節濫派以杜浮估疏

案准工部咨開該錦衣衛題稱只遜駕衣不敷移咨前來備開大紅青綠只遜紵絲一萬一千五百副大紅青綠通袖膝襪九千五百副新添大紅青綠改機紬六千五百副其應天等府聽南京供應機房織造內監兼督其浙江蘇松二府聽蘇杭織造內監兼督等因到臣隨行應天府并蘇常徽寧四道查處料價去後隨據各屬回稱今次所派只遜數倍於昔兼以新添改機紬五千副地方疲困已極何堪額外辦造等因各稟呈前來竊照鑾駕出入鹵簿自有常員寶位初登服御煥然一改旗尉駕衣誠不可缺然從來未有增至三萬餘副者增之自今日始從來未有創織機紬者創之自今日始不覈實用多寡之數不循祖宗相沿之制濫行派織

乾坤正氣集

卷二十九

四

蠹國病民帑藏爲之一空姦機因以自潤嗟乎今東南之財乃襟肘畢露之時今東南之民乃皮骨僅存之日惟正之供輸尙思節省不經之額數豈宜漫徵此數如題自工部則工部宜力請改正此數如出自中裁望皇上亟爲轉圜臣等固不敢請盡罷免以詘典禮之需亦不敢因循浮估以飽宵人之欲伏乞勅下該部將原數特減三分之二仍將神宗所存留未盡者檢出應用在聖主向思澣衣在旗尉豈棄舊服并乞查臣前疏所陳溷派蘇松者盡行停免以復舊制所謂省一分地方受一分之惠斷不宜以輿從之服困鶉結之民以濫觴之需竭公私之藏皇上下念恤民上求裕國必不以臣言爲妄矣

請駁織監瀆陳以安匠役疏

臣接邸報見蘇杭織造太監李實一本爲屬匠違旨抗織等事臣

尙未見全疏先是曾接該監手本謂工部所派數目加昔數倍必僉勾匠役以協織近又見松江府官審萬程等是民非匠詳文報該監意該監必不聽宵人之妄捏貽民間之騷然乃不意竟以匠役萬程等上聒聖聽臣不能無說而處此謹將始末爲皇上陳之該本府知府張宗衡看得織造之命出自朝廷設監府以統其成將緞疋之美惡精粗於是焉致詰至一切堂長錢糧則各地方有司事也舊例僉派匠役本監牌行該廳轉行局官查明申報所從來久遠矣誠以本監自內廷出稱天子親近臣無由知民間情僞不欲以瑣瑣事相煩且并以寓防微杜漸之意云爾今本監信小甲陶孫及張密揭定名差拘豈眞未請典章妄欲越俎於本等職分之外耶抑或有意雄行先故爲此非分舉動以相嘗試耶本監輕入蜚語垂涎素封該廳駁之不得本府持之不得勢不至槩松

乾坤正氣集

卷言安

五

江殷實之家而盡匠焉不止害有不可勝言者且浙直相去甚遠何以知某某爲眞正殷實何以知殷實家爲眞正匠戶噫惟其以殷實故是以不匠而匠適以自揭其肺腑耳等因到臣嚴批禁私報之人正欲移文該監照舊規行府廳審僉報頂毋聽好人弄播忽見李實妄陳捧誦明旨著撫按拏送臣不勝駭愕謹會同巡按直隸監察御史潘士良看得織造之價民間一之官家五之然而有餘之利不歸於匠也匠至猾者方能同貓鼠之眠稍拙者不足供豺虎之壑於是有告頂者有逃頂者而僉報之間又是宵人一番利藪矣舊例報以局官審以府佐酌其戶籍定其去留稍有不公衆匠得而譁之院道得而問之故法畫一而人情安未有么麼之小甲參隨之假官私報於該監徑坐名以行提者也撫按事無大小必批行於道府聽其斟酌妥當而後允行今松江府同知孫

應寬遵該監之牌行逐名研審孰爲民不溷匠孰爲貧不堪役分別已悉更申明職守之不可移小甲所官之不可聽此雖拂其所欲而實爲忠告未有薄愬逢怒信狐假之宵人凌奉法之府佐如該監者也今不憬然開悟速改前迷乃更以小甲之細言溷聖聽於九重以猥瑣之蟻役煩煌赫之天語憑參隨爲線索視有司爲水火埋暗地之鈎距張彌天之網羅借絲綸以明徒木之威枉萬乘而遂彈雀之謀此旨一布則吳民之殷實者人人自危而參隨之私報者人人飽愆怨叢於李實而貽皇上以不美之名臣等爲明旨惜也夫實得旨易臣等得旨難臣等豈不知然臣終不敢撓三尺以歛一方之怨毒而朋爲欺罔以誤陛下近又見青浦縣招報奸棍顧松先年賣田與朱春因索貼銀不遂密囑參隨所官張永成誣春爲匠戶沈阿全後裔致列名其中此卽一縣一人而言乾坤正氣集

卷三百九十六

六

餘尙不止此今人心魄顛監役縱橫將恐豕戶驚惶事極變生其害可勝言哉伏乞立賜乾斷收回成命勅下工部覆請將僉報堂長遵照舊例府廳申詳不許小甲參隨藉開騙局爲匠爲民容臣等行所屬從公審別僉報庶奸棍不得肆嚇詐之詭計而閭閻銷無窮之隱憂矣

請宥非罪被誣府佐疏

臣於邸報中見織監李實一本奉聖旨蘇松料銀毫不給發同知楊姜貪贓敗露抗旨冒罪希圖掩飾本當差官拏治姑著撫按官嚴查贓私參提具奏欽此袍價取給於料銀而蘇松歲徵料銀不過肆萬有奇額編止有此數往年織造孫隆與近時呂貴皆未嘗過溢於編數之外也今織監李實謬張虛額一味誅求倚信參隨百計冒破蓋有必不可聽者四請得而悉言之臣查部咨今次袍

數派九萬五千餘疋蒙減三分之一則爲六萬三千餘疋臣又查
神宗卽位初年止派五萬餘疋仍有蠲免是以臣等會合詞疏懇
皇上祖述成憲以蘇物力工部亦諄諄具請矣而李實反謂皇上
原派十五萬以誑堂匠臣遍閱並無一十五萬之派文無非派多
則取利多而故張虛數耳此其必不可聽者一臣又據實初估價
以百萬計僉云虛冒之極誠得一奉公之內臣任之此中可省五
六十萬然而無望於李實矣卽就百萬之估浙六直四浙若得六
十萬蘇松亦止應四十萬以四十萬分爲十八運每年兩運應得
四萬有奇而蘇松解已足數矣今織監兩運造冊移臣乃索取蘇
松九萬二千而且以三運續解之銀欲併入於兩運之數以此積
算是十八運將索蘇松九十萬並折價而盡輸也臣於是時若不
講明則此後十五運必將沿爲定例而臣以一時之因循貽蘇松

乾坤正氣集

卷二百九十六

七

無窮之累臣罪滋大矣此其必不可聽者二織造監局各役咸以
通融那借爲請臣思此時搜括已窮庫藏如洗蘇郡財賦所出之
區也而庫無千金之儲將那京邊乎將那金花乎將那遼餉乎項
項有歛朝入庫而夕起批尙苦於不足分數有司時蒙參罰又烏
能悉停別項之急征而槩充織局無藝之誅求也此其必不可聽
者三緞疋顏色之中大紅與淺色金閃與暗花料價不啻懸矣部
派原有定數大都紅閃居十之二三每運數原無幾歷來舊案斑
斑可考今實多遺淺色暗花與蘇州府緞數開大紅金閃等色數
倍若將盡舉後運貴價之色而取給於一時無非假飾捏造紅閃
多則濡染多耳二運蘇州給解逾額三運蘇州止應找緞三百五
十疋堂匠交緞不收直欲駕此局面以爲挑激計而顯施辣手此
其必不可聽者四是役也臣愚區區一念爲地方惜已空之皮骨

爲該監塞無涯之漏卮以致大拂其心於府同知楊姜無與也祇因該監恨其不破例行屬禮以爲所司之倡於天啟二年捏情妄參今復巧於下石不惟顯誣之以抗旨而且陰中之以犯贓頃者一二參隨嘗布流言謂中傷一同知而屬禮可定庫銀任取臣以爲細人蜚語不足信而不意實之謀果出於此而皇上誤聽之也今合郡士民見本官杜門惶惶泣留而通屬薦紳將士無不稱冤願借實仇有司則拂百姓拂百姓則百姓必將仇實念及於此可不寒心而况暗干糾劾大權將置撫按何地不獨下拂輿情抑且上闕國體誠有如科臣所抄參者至於袍服之外爲歲造爲改造爲只遜皆有司事自陳增以包攬致禍劉呂兩監皆未嘗過而問焉不意該監之復以身爲谿壑也毋論脔削無屬厭之期而一領一解一驗一發旣自北而之南復自南而之北紆迴千餘里轉運

必至後時臣觀薊遼宣大延綏等鎮邊賞不過差一能幹佐領官至蘇杭平買其爲值也甚廉其竣事也不過數旬若定欲併歸該監以厚利貽李實則可若爲公家計臣見其無濟於事而且階厲也總之袍服之銀臣欲其照常取於條編四司料銀之內而實必欲溢取於條編四司料銀之外徽寧等府歲改及協濟料銀民機止願就近領造而實聽信監棍必勒其赴杭往返近諸蠹鑽差四出大肆騷擾鎮江匠役又疊疊赴告矣臣爲皇上保守江南一方所慮者在呼吸安危之變而實所見者僅在阿堵多寡之間臣爲皇上經理財用所圖者在酌盈濟虛之計而實所急者常在吮膏吸髓之謀實身如撲滿臣言如沃石卽欲與之同心勢必不能要非臣敢有意於異同也伏乞皇上俯念蘇府料銀已盡起解原無拖欠松鎮徽州等府歲改與楊姜無干特賜開宥以昭令德仍嚴

諭李實節取料價於額數之中緞疋勿虛張數目紅閃勿併取一時料價勿多扣入已毋憑參隨之撥置而與有司爲柄鑿毋設緩急之機關而捏虛詞以萋菲則地方受李實安靜之賜而臣等亦可與同心以效上供矣

劾織監中涓李實疏

臣爲織造事奏報錢糧欸額并辯府佐楊姜無罪被誣皆據實剖白不敢飾說偏護自干欺罔伏蒙聖旨袍緞僨造不前皆因料價稽誤楊姜貪肆久著借端掩罪撫按官亦不論官評輒便偏護違遵旨從公參處勒限回奏如再仍前曲庇不行提究定行差官拏治該部知道欽此除會行提查外恭釋天語若謂楊姜眞貪眞肆假織造之事以掩罪而臣庇貪庇肆溺糾劾之職以縱奸矣臣蒙皇恩拔擢爲一方長吏有糾劾之責假令屬官果有一二不法之

乾坤正氣集

卷二百九十六

九

事安敢喋喋焉倒墨爲素翻黑作白不憚以身翼蔽令其流毒一方此則不忠之大義所不敢出者也自再奉嚴旨臣思不得其故尙恐本官前膺持斧使者幾十薦或躡虛聲復再三詢訪求其劣狀竟無所得而且有賢名各州縣官咸爲之發憤出揭士民亦各具呈揭歷數政績以告及詢所以被萋菲之故不過曰彊項不善求容如與李實爭照各監舊規不肯倡行屬禮而已今本官凜奉天威束身待罪累呈求臣等參糾輕重之處惟皇上所命此固臣子敬畏一念其情眞其詞切然而臣終不敢抹殺公評以欺聖明尤不忍瞞昧本心以錮屬吏也楊姜一小吏耳訶之譴之何足惜獨惜賢奸從此混淆紀綱從此倒置凡有求不遂者皆得挾私忿中人以不測之禍甚非清世所宜見耳伏望皇上開日月之明恢天地之度初焉疑其抗違而責之旣焉廉其無他而釋之則天下

臣工皆誦聖心虛明聖恩廣大宥一楊姜而爲外吏者無不人人感奮而李實亦可與人情相安不至釀怨毒而被不美之名矣夫誅譽言日至之阿而封毀言日至之卽墨威王所以塞讒也賜阻蹕之上東門候而貶奉詔之中東門候光武所以飭吏也執法骯髒者近於肆而職業克修軟熟狐媚者近於謹而簞籩多議此吏治賢否之大概臣又願皇上之熟思而詳察也惟是臣以至庸極劣謬任撫綏誠不足以動聽言不足以見信一疏再疏回天無術則負君尸素經年官評尙無確據屢煩嚴督則負官臣不能狗織監以滿其欲而鯁爲焉講明料價致其誣參葛藤難斷則負屬吏然則不稱任使而速當議罷者無如臣矣臣罷則屬吏貪廉自有一段眞公案而不至以疑臣者轉疑臺臣之曲庇臣罷則察吏安民自有賢撫而不至以遺於耳目之近者反得之深官之中伏乞

乾坤正氣集

卷三百六

十

皇上將臣先賜罷斥然後覆查本官貪贓事跡有無的據勘明回奏則水落石出覲見冰消而臣朴忠一念縱不見亮於在事尤冀終明於去後也惟是織造一事當泰昌時已盡撤回李實鑽領此差因而再遣若肯照依兩府料銀額編之數按運解給不創從前未有之例卽江南官民之擾則銜命天使臣等豈有不願同心協力而故生枝節分柄鑿以成水火之形哉今戎馬生郊江南安則邊事可支京都可守江南不安則雖有謀臣猛士其不能枵腹而爲皇上修戰守之事也明矣此何等時可令一織使破成例冒錢糧騷動列郡蹂躪生靈激生意外之變哉又望皇上與執政之臣參酌而爲社稷計也先臣端毅王恕撫江南奏停織造而文忠楊廷和爲閣臣不撰織造勅則亦豈非盛事哉臣曷勝激切待命之

至

再劾織監中涓李實疏

臣以蘇松兩郡料額有定無點金之術以遂織監谿壑之求李實因此肆螫於同知楊姜臣願一罷以白此丞之無他而皇上不加臣以譴逐更令安心供職又念臣力請免楊同知之逮治而革職爲民此不惟臣荷優容之仁卽揚姜亦深感寬處之德然而姜原無擅減之事以此坐錮臣雖覩顏就列誠有大不安於心者頃又見李實據拾逞辯鋒深詞遁措詞倨侮垂涎無厭皆繇宵小指點提弄臣不明白參透定貽不了費端夫袍緞以四十萬分爲十八運按運支銀原編額止有此數卽實之疏亦不敢謂蘇松料額有溢此數之外事理甚明不煩喋喋楊姜奉法急公並未擅減昔漢文帝以阜綈革履致海內之殷富宋仁宗因陝西用兵行三司議節省官壺服御假令姜果能爲皇上減省冒費是以中興之主望

乾坤正氣集

卷三百九十六

十一

皇上則固敬君之至者豈不卓然賢吏然而原非有減也皇上聽實之言而以擅減不敬坐姜此天下所共憐臣之所大不安而皇上所當轉圜而照其覆盆者也實來松杭一味營利兼饒辣手講屬吏之禮罰官府之俸開密訪之門捉民機爲匠人甚苦之乃又有肯達成憲決裂舊章兩事則歲改與袍船是已夫李實初時之營領袍差也會具疏欲踵孫隆行事而孫隆於蘇松袍服之外未嘗侵管鎮徽寧廣各府州歲改此數處向無貂璫之跡今一旦添一中涓騷動其間不但參隨絡繹驛遞怨咨萬一奸民搆出事端誠恐禍生叵測臣之所慮不徒在爲有司存累年之常規而深爲地方防意外之隱憂近來數郡中攫取已收去銀鉅萬並未聞一縷解京濟用則無益公家而有害於地方不再計明矣此其必不可紛更者一也又袍船每歲八隻神宗已裁定著爲例劉呂兩監

行之久矣今忽增造二隻歲歲要加派修造之費驛驛要設處夫廩之費李實不過得奸猾船頭等些小微利而有司加派之擾不顧也萬里挽曳之苦不恤也漏關闢萬千之稅不念也此其必不可紛更者二也大凡管織造之官多勸皇上奢侈少勸皇上節儉臣何敢以盛德事望實但望其照舊例循行不至格外作耗足矣仇士良言固寵之術必使人主廣侈其耳目而後我輩可以得志呂強每事直諫力求先裁一切之虛冒實自視於此兩人者何居則所謂不敬莫大乎是伏乞皇上嚴諭李實於歲改袍船一事但令照舊勿聽宵人撥置恣意更張此江南之大幸皇上之至明至斷也楊姜雖已飄然遠引甘爲聖世逸民更當諒其無擅減之罪曲賜輕處則臣言見采地方蒙麻雖加三禡臣官有餘榮矣

請興江南水利疏

乾坤正氣集

卷三百九十六

七

江南蘇松常鎮四郡幅員不過五百里歲輸租粒二百餘萬最急莫如水利而水利之最大者莫如吳淞白茆劉河三江葢環蘇松常與嘉湖數郡之湖澤咸歸翕於此爲宣泄入海之道近劉河一線僅通吐納而吳淞與白茆二水則淤爲平陸前代屢濬具有史志可考國朝永樂二年尙書夏原吉來濬之正統六年工部侍郎周忱濬之隆慶四年都御史海瑞濬之至今而五十餘年並未施工以致吳淞江自澳塘以至新涇口及東西蘆浦三壩等處六七十里淤澱不通白茆則梅林塘墩鎮涇等處俱久填塞先後建議之臣皆以爲請本屬鄉紳亦每每叩閭求濬而輒以費浩中寢三吳百千萬生靈之命脈引領此舉而皇上未有治水之命地方不敢擅興大役邇年小有水災低田輒淹沒直浙數郡皆受其患如長洲吳江常熟崑嘉上青無宜等邑之間荒田數萬頃每遇漕白

兌運之時有司但得派高鄉攤補而高鄉賦役原重又不甘心爲
低區白賠以此有司常考成降罰而小民受敲扑追呼亦終不能
完額今年巨浸暴漲瀾漫千里者水之爲害也雨後停蓄經旬不
消者水利不修之爲害也若今日又因循不治則東南水患日甚
一日而國賦與民生兩受其累矣臣查都御史海瑞開吳淞用銀
七萬有奇前按臣薛貞曾委官估計數目亦不相遠白茆則知縣
宋賢力請疏濬大約工力可五萬而足通計兩江工費以十二萬
計查三十六年除應天六府賑濟不計外蘇松等府實蒙發賑銀
五萬今時詘度支雖不能多發帑金而賑災不可少或可就以賑
數再添一二萬發開河工臣檄各鄉飢民盡赴工作計丈定工計
人授糲計日給直所全活必無量而水利亦興後雖有霖潦不至
傷稼昔宋臣范仲淹守臨安遇歲凶口乃大興工作募飢民赴役

乾坤正氣集 卷三十九

七

就食賴以全活者不可勝計今臣所言實師此意尙欠五萬兩容
臣於所屬再搜括積欠導河銀并贓贖再查照往贖或量行募派
以奏其績若夫濬之之法惟在尋其故道淺者深之窄者廣之應
閘者閘應堰者堰應石者石豪民有於淤地之傍墾成業者如不
大妨河心寧稍縮其河面以存之期於水通而止但不許一二奸
猾占淤塞爲私業者嗚堪輿播爲風水之說以陰行阻撓查上海
地方宏治間開濬而錢福大魁嘉靖間開濬而徐階入相水道通
達文運亦顯赫若此今設不可信之堪輿而貽數郡之水害卽眞
有小礙尙當擇利從大而况原無關風氣第爲阻撓占墾之謀乎
昔成祖命尙書夏原吉出治水遣官齎水利集以賜原吉其注意
如此是以奉行者皆殫其心力克有成功今皇上若肯留神此舉
乞於工部司屬中簡任練達官一員來董其事以明聖意之決方

不爲道傍之築至於分任府佐等官則就所屬可揀用也

請修實政以弭災變疏

看得坤道以靜爲主震動實乖其常春當陽氣發生之候陽伏而不能起與陰相搏故震而有聲爲照松江一屬自滬瀆澱湖以外蕩漾無際東接諸番蘇常諸郡藉爲藩籬者也今四日之間震動者再變不虛生人情驚恐皆臣等奉職無狀所致除痛加修省及申飭文武諸臣矢心慎志共圖消弭外臣等於元象雖無所知然於人事實切隱憂稽之象占有曰地震其民擾江南賦稅最重猶曰則壤之供義無所逃乃年來軍旅之絡繹加派之追呼織造之需求遼米之帶運民間騷擾漸成蕭條景象此臣等之所大慮也占又曰地震歲不豐夫京邊倉盈庾億皆取給江南此中預防水澇惟水利最急乃濬築之政數年不舉皆由邇來搜括太盡有司

乾坤正氣集

卷三見六

五

工作無從措辦萬一流行及於昏墊愆降爽乎月離則匱乏之害豈獨一郡一邑受之此臣之所大慮也占又曰地震下有謀去歲奸人馬文元造妖言以煽惑愚民又有連盜周忠結徒黨而陰行叵測已經按臣及道府相機撲滅然而草澤尚有伏戎刀犢未易向化又臣之所大慮也此皆就江南防未然之咎徵而實上關朝政之缺失伏乞聖明留意修省俯念軍國官府之需無一不資於江南必江南安而後京師安慨然發德音下明詔滌煩去苛與民休息將兆庶之懼呼卽爲清寧之維軸詎直祥桑萎於一朝榮感退於三舍已哉臣等覩茲災異不敢不仰干天聽因效款款之忠如此云

請罷煩苛以弭災事疏

竊照嚴密禁地忽遭回祿固云人事之疎虞而陰陽失調離火爲

皆實緣神明之默告春秋兩觀災書桓釐宮災書凡書災十有二無非以天人感召之故不可忽而筆之爲後世垂戒也金陵王迹始基佳氣蒼鬱天之所鍾也上帝眷顧方隆百靈必爲呵護曷爲而有今日之災臣曰此天意也留都鼎建宮闕高皇帝之靈寶式憑之雖豐鎬之卜遷實歆馨而棲饗曷爲而有今日之災臣又曰此高皇帝意也臣觀史見高皇帝講洪範休咎之微諭羣臣曰天道微渺難知人事感通易見天人一理類應如響箕子以是告武王今宜體此意上下交修斯爲格天之本旨哉言乎誠洞釋箕疇至義茲不意火災告變乃在皇祖締造之宮臣於是卽以祖訓交警之說進臣備員江南受事數月奉職無狀閭里之蓋藏已盡而持牒追呼不能不急絲縷之杼軸幾空而濫額浮派不能不催非不日討兵戎而海上每聞鹽盜之出沒非不日清錢穀而藏中時乾坤正氣集

卷二見六

五

有奸胥之蠹嚙吏治似多循良而堪掛抨彈之章者未必盡清民風似覺文雅而好呈雀角之訟者難使頓化此皆臣痛自責咎而并與所屬共圖劾勵省愆者也至於時事每有隱憂時政間多缺失敵馬牧於郊有燎原之勢師旅老於戍有不戢之虞雜芟施於民有蘊崇之怨燕雀處於堂有厝火之危威福脫於柄有蔽明之象此皆天心所垂仁高皇帝之靈所告戒而我皇上所宜速下罪己之詔併勅大小臣工求直言交修務使憲舊章以出治通粹德於元穹天下安而股肱之地自寧祖靈安而上帝之心自順矣

請修省以弭災疏

看得臣屬松江去春已有地震之異今次且震亘數百里搖動數郡矣抑且有一二時而兩三震矣震而瓦木有聲至有圯城頽屋者矣稽之史曰陽爲陰所填而不得升則震姑勿論占驗之說豈

有陰壓陽而二氣不干五行不愆災疹不生人物不戾者乎伏見
報京師地震奉聖旨今歲各處災異及京師地震朕深懷惻惕封
疆多事著內外臣工盡心職業務修安攘實政母事虛文臣等躬
值此異皆奉職無狀所致除痛加修省及申飭文武將吏矢心慎
愆共圖消弭外竊照江南祖宗陵寢之地財賦數百萬所出之區
此地安危天下治亂之候也而今日天時人事有大可憂者江左
素尚風流重儒雅近乃好談兵語亂伏觀皇上銳意求治臣等方
以爲是中興之象而左道妖言狂妄不逞之徒見邊事尙急派徵
無藝且曰是季世之象偏袒而奮白梃之秋也轉相愚惑遂漸違
逆萌雖各各就捕而餘黨豈盡消滅臣卽條教與刀鋸並行未便
回心嚮道不可不謂人心之變也又去歲七八月忽早垂黃之穎
轉爲半實之穗棉花則半顆不結而歲征布縷皆謀轉鬻於中州

乾坤正氣集

卷三百九十六

六

各河道處處乾涸卽孟河太湖之間素汪洋澎湃洄澁不可行舟
貨物柴薪一時湧貴父老皆以爲百年未見之異臣於歲災未敢
轉報以啟小民觀望負稅於水涸亦不敢輕報以不祥災異傳播
中外然而不可不謂天時之變也有此二變而地震隨之臣等又
虞其召災於將來也震後不十日而浙之長興遭大盜慘變此亦
其徵應而臣等又慮其未盡消融於已事也昔漢宣帝聞地震下
詔求直言舉賢良方正又假貸貧民而災變亦遂消弭伏乞皇上
求極言敢諫之臣舉巖穴忠讜之士亟講所爲盡人事以回災變
之策又望俯念江南虛耗已極百姓殫其地之出竭其廬之入以
奉敲吸長此不已必馴至不可救藥目前筴塞未定庚癸時呼卽
不能下蠲租貸貧之令亦宜速沛德音一切煩苛盡行報罷行郡
縣吏務於催科中求撫字之仁臣等凡民間疾苦具疏請命者祈

一一允之施行則閭巷無怨讟之聲而奸徒亦不敢有越軼之志
根本安而仁氣和而天地變異自消矣

請免舊逋以蘇民困疏

看得長洲爲姑蘇巖邑有殷富之名而慮凋敝之實蓋田多下
賦皆上上不必陽侯肆虐民始有魚鼈之憂卽暑雨稍頻水勢微
漲便若洪波白浪禾稼率付波臣故爲令於茲邑其拮据最難其
受罰最易如知縣葉成章任內四十七八年年俱因水區被災將
漕糧伍萬三萬議改熟區代完而以折銀派令荒區認納以示矜
恤乃糧完而銀欠遂不免奉部查參矣今國用方殷持籌者每厘
仰屋之歎賦額有定司牧者敢後則壤之供惟是長洲素稱澤國
比各縣田地獨多窪下如狄溪席墟青邱等低鄉共十八水區卽
在豐歲猶無半熟稍有水澇便罹大荒知縣葉成章抵任以來疊

乾坤正氣集

卷三百九六

七

遭萬厯四十七八年淫雨爲災低田悉成巨浸漕糧亦難輸將是
時卽當具題請蠲而境內未全歉例不敢請本官不得已調劑申
請令高鄉代災區完糧災區代高鄉完折無奈災黎困敝高鄉之
本色旣已代輸而低鄉之折色竟爾拖負非不日費敲朴而無肉
可剗非不日嚴追呼而無戶可催以致京邊分數不及致累本官
向蒙降罰實與他邑之不及分數者不同今部文咨臣覆查隨行
道府查勘所據造送災區細冊與初詳相同設非真正災荒則雖
通縣高區誰肯爲之攤納漕白二糧而該縣非日擊時艱法窮力
竭寧能身甘降罰終不敢向頑民以責逋欠哉臣近又檄行履畝
繪圖道府所報並非虛冒竊睹先帝遺詔有加派一年量免帶徵
一年之例今該縣加派已三年矣則四十八年以前積欠政應在
豁免年分相應具題俯准本官開俸豁其舊欠令督催見年錢糧

務如數完解再昭知縣葉成章之治長洲拮据首邑勵精化理以清靜寓神明以撫字兼催科革除一切耗羨操守不染纖毫蓋勞吏亦靡吏也臣不敢以積年之舊逋而使先帝遺詔不信於天下又不敢以應豁之積欠而使循令考成竟受其降罰是以慄懼具陳仰丐寬政伏乞勅下戶部查議覆請將四十七八兩年災銀豁免知縣葉成章卽開復俸考滿所以沛皇恩而勸吏治在此舉矣

報異常水災疏

臣屬江南地勢卑窪素稱澤國外瀕滄海受西來羣山之委流內布蕩湖淺而漫衍易涸亦易漲易旱亦易潦舊秋七八月旱乾西成大減分數臣此時以災未甚重不敢具請以啟納戶觀望彼農夫忍飢餒服襪稱貸竭胼胝之苦以盡力於南畝者誠冀時和歲豐下以佐俯仰之資而上輸國家之賦耳詎期今歲蘇松常鎮

乾坤正氣集

卷二頁六

六

及應徽等府自三月末旬至五月末旬霖雨連綿傾盆注下晝夜無傾刻之停隄岸潰裂江湖泛溢百川逆流浩淼無涯高下盡淪祈禱不應城垣坍塌屋廬漂沒卽臣署亦淪倒寮垣圍兵而宿閭井小民歛歔之聲與簷溜相徹慘不可聞又據各屬來報見麩麥皆變爲菹其粒不可以嘗飢者炒以充腹輒吐逆而傷人其麥之幹皆自水中撈出朽腐而不可以作爨所插秧苗未出土者已絕根芽方出土者盡捲泥淖一望耨鋤之區頓成舟子鼓棹之大澤至於嘉定太倉等種棉之地宜燥不宜濕者根株芽蘖盡付東流又不待問矣父老相傳萬曆三十六年曾遇此災但其時二麥已收又在屢稔之後無兵興加派之苦帑有積儲民有宿儲公私尙可勉支然猶且搶奪四起費幾許拯救方克寧帖此時災傷視三十六年更甚且加派頻仍箇篋已匱乃復凶歉薦至譬之病夫纏

穀僅存精血幾耗更益之以家無蓋藏饔餐不給又安望有起色哉當此可農仰屋恨無點金之術以噉邊圉戰士爲臣子者方將東那西括共濟公家之急設百姓非萬分愁苦詎敢故爲呻吟之詞以罔聖聽惟地方實實罹眚之慘報災係臣職分臣疏恨不能委曲描寫夫無災而虛張以報是爲病國臣決不敢有災而隱不以間是爲病民臣尤不敢日漕臣來督儲精見駐鎮江目擊顛連之狀未嘗不痛心蹙額憂形於色也臣奉職無狀痛自警戒除一面檄行道府竭誠齋戒祈禱并通商廣糶積穀買米一切救災之政所屬道府亮皆不敢泄泄從事又令各州縣長吏親往郊原冒雨巡行勞來家咻戶喚水可疏者決渠以殺之堤可築者捧土以掬之其飄廬沉竈顛連無告者量給倉穀以賑之總亦修救於萬分之一二耳臣方抱病求去而遭此厄景酸楚之餘臣病益深即乾坤正氣集卷二百九十六

尤

竭駑力撐持終無所濟非皇上大賜惻隱破格蠲賑安能拯數郡
陸危之蒼赤而登之衽席哉

水災請蠲賑疏

臣於五月間以稽天巨浸漫連數郡菽麥蔬菜連莖葉以俱沉棉
花禾秧溢洪濤而盡腐桑田化爲滄海號泣徧於郊原業具疏報
聞諒聖心惻隱覽疏必愀然動念臣猶謂三吳雖地不堪於兩種
而六月尚可播烏苗通行災重地方有司官親往各鄉勞來督令
堰潰者捧土畚築溝塞者決淤濬通富戶令其捐資借貸貧佃令
其竭力辱車私計稍高之區或可補插薄穫不謂自臣拜疏以後
又經一月今且三秋入序而晴霽之後水且益漲兼以吳淞白茆
二江五十餘年不開入海故道湮塞而浙省苕霅諸派與江海翻
波逆湧蘇松常等數郡地形如坐釜底不能宣洩今舟楫往來不

循河道每見飛帆鼓柁於田畝之間以取捷徑臣令人往驗地淺者可沒頂深者則沒數竿其地勢最高者亦當褰裳而涉補插晚稻嗟已絕望且村落屋廬盡如水中亭榭久爲魚蝦之宅叩之則聞其無人而散之四方者亦不知其所之甚至有枕藉死亡於水崖而不知其姓氏者矣大都無郡不災無邑不災或川騰谷沸人畜蔽溪而下或城圯屋漂男婦巢樹而居或廳署泛汪洋之浸或圩堰瀉澎湃之波或舟筏擄人於城郭或杖鉢呻飢於道傍此等景象見者垂涕聞者酸鼻父老皆言此災比萬曆三十六年甚數倍蓋三十六年高鄉未甚浸而今則高低並滄三十六年一漲便消而今則兼旬不退三十六年菜麥已收而今則饑饉薦至三十六年積貯尙饒而今則十室九空三十六年地方寧戢而今則人心思亂臣而言及於人心思亂則固有不敢言又有不得不言者

乾坤正氣集

卷二百九六

五

我皇上方以江南爲治安顧決禍患於旦夕似欲以危詞徼浩蕩臣是以不敢言然而蛇豕之徒無日不包藏禍心雖倡亂者不必饑而以無居無食之民誘爲斬木揭竿之舉其號召甚易是以臣又不得不言嗟夫罄土之毛不足供食指之衆矣而隣境又無可乞糶鉏犁既賒牛犢亦賣始於搶奪究而弄兵夫豈盡不必然之慮哉周禮荒政十二究之以除盜賊明荒之必亂也荒則必亂故弭亂莫如救荒而救荒莫先足食足食莫先於賑濟與蠲折今東西跋扈師老數年餉耗無算皇上與閣部諸臣舉軍國最急最乏之需以待濟於江南而臣欲以江南最危最苦望澤於皇上似乎見一隅而遺全局臣惟計全局是以益重一隅今日所望皇上亦不過大施一年之惠蠲折賑濟以救此襁褓耄耄小民俾歲歲爲國家急公好義之百姓萬一荒而致亂變出叵測如前所逆料者

卽大費軍需未必便可收拾一年之不割而數年蠲之乎臣所謂顧全局而益重此一隅者也又有言者曰折米利在有田之家不在貧民不知粟出於富人之藏而入於貧者之腹江南豐歲且資客米儉歲益不可支若不先下折令則富室有所積必曰此自留以糊口者也富商有所囤必曰此徐鬻以上供者也如是而米曰乏價曰貴民卽持錢無可買處近見松江十二錢買米一升視京師等貴而好徒河河所屬至有強開粟舍之厥強搶販夫之米非不懸重典以創之政恐徒法不足以止亂七八月後景象當不止此誠於災重縣分速允蠲耗折米則民間稍有蓋藏及商賈之囤聚者皆出鬻以啗貧民則全活已無算此所寬在殷實而所活實在貧窮者也蓋列祖皆知江南賦稅其輸將獨多江南安危其關係極重是以凡遇災沴之歲特沛浩蕩之恩誠以所豁者小而

乾坤正氣集

卷二九六

三

所保者大也今歲撫屬漕白正耗米二百五十餘萬石俱輓輸以達太倉如查儲積通算可濟若干時卽於全災縣分允漕白蠲耗議折至於賑濟乞照往例特遣官員齎賑更望留濟墾闢稅一年及稅契事例贓贖魚課行賑誠災重民飢事勢急迫不得不爲不達時務之請今皇上仁慈天縱眷念定鼎之區在事諸臣軫恤時艱特先本根之計必有大沛德音以慰雲霓矣

再請蠲賑疏

臣屬蘇松等郡自四月被水至今九月嚴霜已降應是川澤收斂之候而茫茫巨浸僅退一尺各屬低區之田園猶在水中也各鄉農夫之廬舍猶在水中也市間菜蔬米穀並貴是饑與饑並告矣此時已宜種麥而一望瀰漫無際圩岸盡裂明春麥黍又除矣臣病苦中荷天恩勉強供職又諭以便宜救荒仰體仁聖雖深居九

重而心已周於江左民間聞此天語靡不動色相告忍死以待濡沫而臣敢不力疾從事以副皇上其咨之念惟是救荒原自無奇而臣才謏劣亦不能於人所常行之外別出肘後之方不過通商勸糶使民間自爲流注不平價不遏糶以聚商賈禁搶奪禁勒借以安富民勸施貸發倉廩以字窮獨下借力於有司上待命於朝廷而已夫本地之毛旣不足供土著之民又安能別措續命之粒以完漕白之輸縱改折而折色之銀已屬賠納此每石米不過沾皇上二三錢之惠耳若猶靳其折色則立見逃徙而危亂在旦夕矣官買之說蓋司農爲百姓爲軍國之慮極苦極忠有司何惜竭蹶爲民受勞然而少或可辦多實難行且與賈子爭販與餓夫爭食將米價益湧而病在官仍在民臣不悉知太倉每月軍糧若干今歲全漕完若干無災地方可完若干度可足若干時之軍糈而乾坤正氣集

餘可折也以輸者養軍而以折者充餉太倉不病也以守凍之船議折而以明年秋冬開兌爲限漕規可復凍開米亦抵灣也臣曩曾待罪漕役頗聞國家歲徵之入額浮於所出原祖宗朝徵派初意亦慮及四方水旱而寬其數以待折不折則數歲或可餘一年折則亦足供一年之支放惟是此時多新增之耗是以司農厘仰屋之憂今臣再有陳瀆誠不達時務然而爲消危亂保根本之計不得不出於此臣伏乞皇上憫念重地災黎勅下戶部覆議照按臣所勘疏欸一一采行地方幸甚臣愚幸甚

請改折以便徵輸事

日按臣張文熙勘疏具報荷皇上於被災十分地方准其全折四郡中若吳江崑山青浦三邑受災十分者皆霑皇上如天之仁不啻起溝中而肉白骨尙以酌議蠲恤未有畫一喁喁懸望部臣之

速覆也至若長洲常熟無錫三邑雖報九分七八釐之災而臣於八九月間細核三邑皆傍湖久淹西成盡虛佃戶並無輸納業主並無登庾卽折色銀兩俱是賠賒小民饔餐俱是取給客米及販來豆麥鄉村耕農之窮窶者半是覓拾菜蔬充飢此三邑誠當與吳江崑山青浦等邑併沾十分之惠不可因一二釐之參差而分別太懸使抱向隅之悲也其太倉宜興江陰吳縣金壇武進華亭上海嘉定丹徒丹陽災有九分以上有八分以上者亦乞照原勘疏分別多寡等第速賜定奪行臣著有司遵照徵納一則使重災者全活其性命早得辦折色以供輸一則使次災者明定其分數早得辦本色以兌運上利國下利民策無逾此不則日復一日其不容不折者施恩旣已後時若飢望食而空垂涎其可以量折者日久亦漸花費不難罄官儲以博一飽如是則雖責有司曰

乾坤正氣集

卷三見六

三

取災民付筮楚以助繭絲之急徒令衆心解體而軍輸亦就嚙耗是兩誤也臣之罪乃滋大此其利害至易明矣臣屬東西十府一州商羊作虐雖無地不滂然而傍山之地水漲兩三日卽消消後猶可補游青晚禾以取薄穫皆不敢徵折今之言折皆水之經秋不退無寸莖登場者然東郡災分爲三等原不敢槩望全折西府最重僅報深陽望江高淳三邑報八九分者不過十邑而臣屬州縣之本色應納者尙多也蓋念國家匱乏非眞正饑荒不敢爲百姓市恩兩按臣之疏具在諒不能逃於部臣之詢訪民旣不產米尙要賠銀漕卽不盡得米亦可協搭以銀裒益之間知計臣爲小民嘔心區畫不遺餘力臣竊謂四年之米目下抵京通二倉明年輕災之地又未嘗廢運誠令全折之地秋成早輸凍後似可望接濟也臣具胸心敢不念太倉之匱乏然事勢至此不得不瀝情哀

懸陸贄有言曰苟不失人何患無財臣今爲江南人心計政深於爲財用計也有戰鬪之士尤不可無耕桑之民無耕桑之民則何必羌夷接踵於疆場萬一桴鼓忽弄擾鋤間以干吾游徼之吏能晏然而已乎又將何以爲飽戰士計耶

請緩徵以利漕運疏

臣見邸報戶部覆蘇松等四郡水災之疏內開江南值霖雨爲祟禾麥失望災之重者以十分計稍輕者以九分以上計最輕者亦以八分七分計當此在在號荒家家懸磬誰不仰賴皇上施浩蕩之鴻恩以惠此顛連之遺黎也然思下民之銖兩皆爲歲派之正額按臣所爲列欸而陳第其中播利溥而受益廣者無如改折漕糧查蘇松常鎮四府州縣除嘉定靖江外餘共計一百一十萬四百五十七石就中三分折其一則該折三十六萬六千八百一十

乾坤正氣集

卷三百九十六

黃

九石然以此除被災十分者遵旨全折外其餘聽撫按道府從公議折以災傷之重輕爲改折之多寡毋俾偏脩致有不均其改折之數議定每石折銀六錢災輕者加五分席板耗羨並在其內月糧腳價之費自應免派等因題奉有明旨矣於是臣四郡中吳江崑山青浦十分災三邑遂得全折既爲三軍圖宿飽又爲三農軫災祿仰見皇上以天爲心者也必使草木咸遂其生計臣體皇上之心以地爲德者也不使軍民偏受其瘠秉軸之臣不啻飢溺在躬所爲達民隱而普皇仁者不知幾費籌畫此中全活何啻百萬生靈臣何敢復有陳瀆惟是部疏以折三分之一爲詞四郡共允折三十六萬餘石而全災三邑已折去二十七萬有奇矣所剩不過九萬有奇耳其九分之災民羣擁而問臣曰部有三分折一之說而今何在也其九分以上七八釐之災民羣擁而問臣曰全災

有十分之折何差之毫釐而懸之霄壤也是計臣責臣以均平而臣更無均平之術可以報計臣也呼號之聲震於遐邇臣以大義責之謂朝廷適當軍興匱乏非昔年京坻有餘積比又不得已而陳刑杖以威之謂不靜聽而譁者罪無赦蓋臣檄有司諭百姓無一牒不嚴督完課然自十月至今倉庾並無顆粒重災者無可完稅輕災者且慮觀望臣日夕憂惶寢處不寧察人情酌事勢非於九萬石外量爲增益必無以安衆志而鼓其輸納臣查被災九分以上州縣分爲等第如長洲常熟實爲最重原與吳崑青三邑相等無錫吳縣宜與太倉武進江陰次之華亭上海金壇等邑又次之不敢瑣瑣塵覽俱逐一臚列具揭於計臣以待裁奪一面嚴催徵以起起運大抵戶部合三邑而算三分之一臣之所乞則除三邑而算三分之一所爭止二十一萬石若合白糧全完而論之所

乾坤正氣集

卷二見六

五

爭止六萬餘石耳查三十六年災各屬多徵全折其所允之折色當年又止徵一半留一半緩之豐年此例班班具在百姓滿望照行今臣不敢援舊例以求多僅僅於三邑外以三分之一請而輕重布之雖未足厭災民之屬望聊以昭朝廷德意使毋抱不均之嘆而臣等亦得畢力催償以了明年漕運之局耳儻謂軍需匱乏本色定當取盈則所浮之數如部臣鄭三俊議將原折銀貯庫候來歲豐熟發折米縣分陸續通融運補爲數不多衆擎亦自易舉自有遼事以來派餉則應徵米則應誠於凶荒飢餓呼吸存亡間救其眼前之顛連延其僅存之喘息小民感恩圖報時和年豐未有不願竭蹶以趨事者也蓋臣伏見太倉告絀絕不敢寬假催科凡士紳來謁皆勸以勉強賠納讓所折之數於小民而此邦士大夫賢而好義者亦自不乏惟是無告窮黎農夫菜傭極寒極窘之

下戶滂沱久注村絕新登之困江楚邊糴市鮮賣穀之販飢軍牛
載枵腹野希竈突之煙有司五月停徵庭多鵠立之狀縱今鮮血
淋漓於杖頭徒使閭閻傷心而解體蓋仁行則輸納之風自鼓恩
斬而柝揚之威亦窮臣不敢盡言亦有不待盡言者洪水泛漲數
月陸沉舊按臣親見之矣客米不至列郡嗷嗷有司蹙額儲庾盡
空新按臣入境備知之矣蘇松地處浙之下流長吳常崑諸邑如
居金底卽在廷言事諸臣亦盡悉之矣邑令之俸深者豈無釋負
之心儻非地方真正窮窘萬不可乏員臣何故拂人情不予其起
輯瑞之會而令其與此地相守上受功令之督責下受災民之怨
嗟哉皇上試查此俸深縣官之所以留而知臣之所以再三控懇
於皇上者非飾說也謹會同巡按直隸監察御史徐吉合詞上請
除將臣酌定各邑折數咨部外伏乞勅下戶部憐臣不得已苦心

乾坤正氣集

卷三頁六

美

再於前折外照臣揭中所酌之數亟爲覆議咨臣等遵行旣活數
郡之遺黎又杜輕災之觀望溝中之瘠可漸甦而臣屬漕白百餘
萬之輓輸亦可早撤有司以催完是爲民生政以爲國計也

請宥勞吏以緩布征疏

嘉定縣土瘠則壤之初以粗布係積貯之物可緩可急輕徭薄賦
之中默寓節宣之意蓋念此沙地之苦有司徵運之難也三十五
年間不知緣何載入考成今據道府復酌爲三分蠲一本一折一
之說更申前請蓋以蠲者爲閭閻之惠以解本色一分爲備賞之
需以解折色一分爲實濟之用又鋪墊悉如常數此不獨爲嘉定
緩布縷之徵有司寬買辦之累實爲內庫畫經久之策也雖經前
院具疏而轉移實在計部此今日之所以目擊艱難而爲此方民
請命也展轉圖維求公私兩利之策經久可行之規請於三分中

停緩一分而徵二分之本色乎蓋所停者僅三萬有奇軍國之錙銖卽爲窮簷之鉅億未有不見德而生其共者而所征者計六萬疋有奇實數之綜核何如虛名之空掛未有不著實而勉爲赴者也主計者亦何愛此三萬疋空懸之額而不以誘其六萬疋必輸之數耶及按臣士良回文到部亦謂當緩徵一分實徵本色二分以救將盡之遺黎夫嘉定之民亦皆我皇上所撫摩之赤子也如謂民之頑冥何至甘於受比而不顧卽謂官之怠玩何至甘於受罰而不辭臣察以虛衷參之輿論總緣該縣土瘠民貧兼之連年重困於加派則誅求到骨計畫無復之耳豈惟皇上宜予以浩蕩之恩卽部臣亦宜示以通融之法無已則請從按臣緩徵一分之議可乎夫當國計殷煩之時而獨徼寬恤如是儻其逋負仍前朝廷三尺俱在卽該縣亦何說之辭是議也可以安濱海嚮競之人

乾坤正氣集

卷三頁六

三

心可以裕皮毛盡落之民力可以彰皇上省刑薄斂之深仁一議而三美具况經年不解該縣且沿以爲常今特緩三萬之虛名而却收六萬有奇之實數計皇上聽臣或不待詞之畢也臣竊觀我神祖最稱綜覈之主也數十年來通算嘉定解布歲不過輸一萬疋止矣我皇上初登之年天下方喁喁望澤乃歲解三四萬疋而猶然下嚴旨責催部臣於是以徵二緩一請矣皇上督臣臣督縣官而縣官轉督小民不知幾費鞭箠以得此數也皇上亦惻然動念乎假令此布果有當於實用如線梭布之必不可已誰敢輕議折色試執此布一疋與銀一錢子軍士臣等固知其領直而不領布也外間解役有腳價利及至收入有鋪墊利耗費且浮於價值以倍矣本一折一之議所以持而不得行者臣等知重在彼而不在此皇上所未察臣亦不敢盡言以激聒也伏乞勅下戶部覆

議所請將知縣卓邁准其開俸考滿併乞俯念嘉定雖有布縷之徵原非本地機杼仍依臣等原請緩一本一折一之說則不獨一邑誦衣被之仁而天下皆誦明聖如天之德矣

請振積玩以清宿弊疏

臣惟錢糧之有會計也所以總一州一邑本折徭役之數而定其派則者也比較之有繇單也所以晰各甲各戶本折徭役之數而限其輸納者也會計定於秋間繇單頒於冬初家各一單單各一印雖至愚者具知應輸之數目至奸者難肆額外之誅求此海內之通規不易之良法也數年來所屬有司無不用心力於催科顧於會計繇單一節多憑總書延閣卽間有賢者能依時具請而府道又或以各縣未齊高閣置之於是比較率用胥役所造無印冊單本折多寡之數小民無從得曉惟懸總與一二包攬脈脈自知

乾坤正氣集

卷三見六

五

卽有司尙多茫然也是以積猾巨蠹得高下其手所增減者毫釐而所差已至千百矣所飛灑者數戶而貽害已徧通邑矣臣於一月間受事首以此諮詢各道則見徵天啟二年稅糧三年徭里條編未有派單今軍國財賦大半仰給三吳公家之派額既重奸胥之科斂更橫自升合分釐而上凡官之所輕爲拔毛皆下之所痛爲剜心者也吏此邦者惟清理錢穀爲首務家戶所倚賴者惟徵輸之政所及爲最廣此處儻不著力更有何事可以留心其爲劣吏不問而可知也今天啟三年稅糧四年徭里又於十月起徵矣臣恐申飭不嚴則積習相沿牢不可轉用是不避煩聒特爲題請伏乞勅下戶部行臣嚴飭道府轉相督責盡破積玩急將戶部頒發會計單款及徭里銀數限於九月間將派徵規則類造通詳查核刊刻書冊印信繇單通限十月初一日頒布務使家戶通曉胥

吏不得爲奸如府縣仍其吏總監司曲徇郡屬遷延沉閣縱容弊
派不遵明例者容臣不時糾參并乞聖明查處施行

乾坤正氣集

卷二百九十六

无

周忠愍奏疏卷二

涇縣潘錫恩校

09972

